



*Iesus rend la vie au fils d'une vefve ; & puis il montre la difficulté de le  
fuiure comme il faut.*

**I**NSI que Iesus-Christ alloit en vne ville nommée Naim, ayant ses Disciples avec luy, grande multitude le fuiuoit. Or comme il approchoit de la porte, on portoit hors vn mort au sepulchre, fils vnique d'une vefve, qui estoit fort dolente, assistée de grande compagnie de la ville. Et quand nostre Seigneur l'eut veüe, meu de compassion enuers elle, luy dist, Ne pleure point ; & toucha la bierre, & ceux qui portoient le corps, s'arrestèrent. Et Iesus dist à l'adolescent, Leue-toy ; & celuy qui estoit mort se leua, & commença à parler. Et Iesus le rendit à sa mere, & tous furent saisis de crainte glorifiant Dieu, & disans : Certes vn grand Prophete s'est leué ; & ce bruit courut par toute la ville. Ainsi donc que Iesus cheminoit, quelqu'un luy dist, Je te suiuray quelque part que tu ailles. Iesus luy répond, les renards ont des fosses, & les oyseaux des nids, mais le Fils de l'Homme n'a pas où reposer son chef. Et il dit à vn autre ; Suy-moy, lequel dist, Permits moy que j'aille enseuelir mon pere ; Iesus luy dist, Laisse les morts enseuelir leurs morts : mais toy, va, & annonce le Royaume de Dieu. Vn autre dist, Je te suiuray Seigneur, mais permets que j'aille prendre congé de ceux de ma maison. Adonc Iesus luy dist, Celuy qui met la main à la charruë, & regarde derriere soy, n'est point propre au Royaume de Dieu.

*S. Matthieu Chap. 8. S. Luc Chap. 7. & 9.*